

Opinion: Accionnan di Estadonan Uni di Merca den Caribe ta obliga nos realisa ta dicon periodismo colaborativo entre Caribe y Hulanda ta un mester den un Reino Hulandes democratico

Den e ultimo simannan, nos a ripara un aumento di cobertura den prensa pa loke ta e area di Caribe. El a cuminsa cu informacion tocante bombardeo di boto cu ta trafica den Laman Caribe, sigui pa algun incidente caminda avion a casi dal den otro den e espacio aereo di Corsou. Despues a sigui noticia tocante e atakenan na Venezuela y e secuestro di presidente Maduro cu su casa. Ta birando cada mas obvio cu e cambio di politica di Estadonan Uni di Merca tin consecuencia pa e region di Caribe.

Normalmente nos no ta topa cu hopi informacion di e islanan Hulandes Caribense: Saba, Sint Eustatius y Sint Maarten of di Aruba, Bonaire y Corsou, den medionan di comunicacion Hulandes Europeo. Pero debi na e desaroyonan reciente geopolitico y deportivo—Corsou a clasifica pa Mundial di football di 2026—e islanan a cuminsa tanta interes di periodistanan.

Sinembargo, fuera di coresponsal di NOS, Dick Drayer, no tin hopi coresponsal Hulandes fiho pa atende cu noticia na e islanan. P’esey, diferente medio di comunicacion a cuminsa manda periodista for di Hulanda pa bai e islanan y busca informacion. Ta importante pa esaki tuma luga, pasobra tin sucesonan preocupante ta tumando luga y nan tin consecuencia concreto pa habitantenan di e islanan Caribense den nos Reino.

Sinembargo, e binida di periodistanan Hulandes Europeo a expone un deficiencia periodistico den prensa Hulandes. Den hopi di e reportahenan, nos ta sinti falta di fuente y experticio local. E bosnan local cu ta sobresali ta principalmente vox pops, esta ciudadanonan preocupa cu pa casualidad nan a topa canto di playa of sinta den cura. Unda expertonan Caribense a keda?

Ademas, periodistanan Hulandes Europeo mayoria bes no ta papia papiamento, cu ta e idioma mas papia na Aruba, Bonaire y Corsou. Fuera di esey, hopi biaha nan ta traha sin interprete, “pasobra toch tur hende ta papia Hulandes”. Esaki ta conduci na un reduccion di e contribucion di bosnan local, pasobra ta forsa habitantenan pa reflecciona riba eventonan di magnitud den nan di dos (of di tres) lenga. Finalmente, tin masha poco colaboracion entre periodistanan Hulandes Europeo y esnan di Caribe.

Esakinan tur ta deficiencianan notabel y presente na gran escala den medionan di comunicacion y publicacionnan Hulandes. Sinembargo no ta riba e redactor- of e

publicacionnan individual nos kier fiha atencion, sino riba e patronchi cu ta birando visibel.

Na cuminsamento di december, Wouter Veenendaal, profesor extraordinario cu ta dedica su mes na studia Relacionnan den Reino na Universidad di Leyden, a skirbi den Volkskrant cu e crisis na Venezuela a expone un deficit democratico den Reino. E ministernan di Defensa y di Asuntonan Exterior di Hulanda ta primordialmente responsabel pa reacciona riba e crisis aki, na nomber di e paisnan autonomo den Reino – Corsou, Aruba y Sint Maarten. Pero e habitantenan di e islanan Caribense no a vota pa Tweede Kamer Hulandes, cu ta esun cu ta controla ehecutcion di e trabou di e ministernan aki.

E situacion di crisis actual ta expone un di dos deficit democratico. Den un democracia, periodismo ta carga e gran responsabilidad pa controla poder di politica. Y aunke periodistanan Caribense ta confiabel y ta reporta sucesonan actual y cuestiona funcionarionan local y nan politica firmemente, e experticio periodistico local ta haya tiki espacio den medionan di comunicacion Hulandes Europeo.

Ademas, e presion riba e redaccion di media Caribense ta halto: nan presupuesto y personal ta limita, mientras cu hopi biaha nan no tin suficiente espacio pa dedica na periodismo profundo of investigativo. Den un situacion asina, ta bira practicamente imposibel pa periodista Caribense investiga maneho y politica di Den Haag, mientras cu na Den Haag ta traha ley, regulacion y maneho cu tin consecuencia pa e islanan Caribense den Reino tambe.

E periodistanan Hulandes Europeo cu actualmente ta reporta riba y tocante e islanan aki ta traha generalmente di forma independiente, siendo cu nan lo por a colabora cu nan coleganan na e islanan cu conoce e situacion local miho. Nan tin conocimiento di materia, nan ta consciente di e sintimentonan cu ta reina y nan ta dispone di contacto- y e fuentenan local.

Emma Pullen, un investigado den Administracion Publico y Ciencia di Organizacion (Bestuurs- en Organisatiewetenschap) na Universidad di Utrecht y Glenn Thode, ex-gezaghebber di Bonaire y ex-rector di Universidad di Aruba, ta argumenta cu nos no mester considera solamente con ta defende Reino ora di guera cu tanki y tropa. E pregunta cardinal ta mas bien con conecta e teritorionan di Reino cu lama ta separa for di otro. Nan contesta tabata: enfoca riba con ta crea coherencia y comunicacion.

Segun nos, coherencia y comunicacion no mester ta solamente entre e gremionan administrativo y politico, sino tambe hustamente den mundo di periodismo. Esaki ta rekeri pa e periodistanan Caribense haya e recursonan necesario pa cumpli cu nan debenan periodistico. Pa logra esaki, redactor-, politico-, administrado- y fundacionnan, tanto na Hulanda, como na e islanan, mester analisa di un forma critico nan prioridadnan y e manera cu ta aloca e recursonan cu tin.

Mientrastanto, redaccion- y periodistanan Caribense y Hulandes Europeo ya a dal un paso importante den e direccion aki: trahando hunto, y compartiendo e recurso- y plataformanan disponibel. Ta hustamente periodistanan ta esunnan cu mester contribui na suministro di informacion honesto y balansa. Pasobra, si nos kier fortalece democracia den henter Reino, nos mester crea hunto un cultura periodistico comparti, cu ta abarca henter Reino.